

四庫全書

史部

欽定四庫全書

唐會要卷七十四

宋王溥撰

選部上

論選事

舊制內外官皆吏部啓奏授之大則署置三公小則綜覈流品自隋已降職事五品已上官中書門下訪擇奏然後下制授之唐承隋制初則尚書銓掌六品七品選

侍郎銓掌八品選三年一大集每年一小集其後尚書
侍郎通掌六品以下選其員外郎監察御史亦吏部謁
訖尚書侍郎為之典自貞觀以後員外郎乃制授之又
至則天朝以吏部權輕監察亦制授之其銓綜也南曹
綜覈之廢置與奪之銓曹注擬之尚書僕射兼書之門
下詳覆之覆成而後與官至肅宗即位靈武強寇在郊
始命中書以功狀除官非舊制也

武德五年太僕卿張道源上表以吏曹文簿繁密易生

姦欺請議減之高祖下其議百寮僉同者惟太史傅奕
言至當迫於衆議事竟不行

貞觀元年正月侍中攝吏部尚書杜如晦上言曰比者
吏部擇人惟取言辭刀筆不悉景行數年之後惡跡始
彰雖加刑戮而百姓已受其弊上曰如何以得人如晦
對曰兩漢取人皆行著州閭然後入用今每年選集尚
數千人厚貌飾詞不可悉知選司但配其階品而已所
以不能得才魏徵亦曰知人之事自古為難故考績黜

陟察其善惡今欲求人必須審訪才行兼美始可任用
上將依古法令本州辟召會功臣將行世封其事遂止
二十年黃門侍郎褚遂良上表曰貞觀初杜淹為御史
大夫檢校選事此人至誠在公實稱所使凡所採訪七
十餘人比並聞其嘉聲積久研覆一人之身或經百問
知其器能以此進舉身既染疾伏枕經年將臨屬纊猶
進名不已陛下悉擢用之並有清廉幹用衆所服願大
唐得人於斯為美陛下任一杜淹得七十餘人天下稱

之此則偏委忠良不必衆舉之明效也

顯慶二年黃門侍郎知吏部選事劉祥道上疏曰今選司取士傷多且濫每年入流數過一千四百人是傷多也雜色入流不加銓簡是傷濫也古之選者不聞為官擇人取人多而官員少也今官員有數而入流無限以有數供無限遂令九流繁總人隨歲積謹約准所須人量支年別入流者令内外文武官一品以下九品以上一萬三千六百四十五員舉大數當一萬四千人壯室而

仕耳順而退取其中數不過支三十年此則一萬四千人支三十年而畧盡若年別入流者五百人三十年便得一萬五千人定數頃者一萬四千四百六十五人足充所須之數况三十年之外在官者猶多此便有餘不慮其少今年當入流者遂餘一千四百計應須數外恒餘兩倍又常選者仍停六七千人更復年別新加實非處置之法望請釐革稍清其選中書令杜正倫亦言入流者多為政之弊公卿以下憚於改作事竟不行

蘇氏議曰冕每讀國史未嘗不廢書歎息況今河西隴右已非我境河北河南關中上計官員大數比天寶中三分減一入流之人比天寶中三分加一自然須作法造格增選加考設險阻進選司詆才能嗟乎士子二年守官十年待選欲使天下稱野無遺賢不可得也若比祥道所述且十倍不更弊乎

開耀元年四月十一日勅吏部兵部選人漸多及其銓

量十放六七既疲於來往又虛費資糧宜付尚書省集
京官九品以上議崇文館直學士崔融議曰令皇家兩
曹妙選三官備設拔其杞梓寧其蕭稂其有疾狀犯贓私
罪當懲貶者此等既未合得伏望許同選例錄以選勞
又選人每年長名常至正月半後伏望速改銓簡促以
程期因其物情亦何疲於來往順其人欲亦何費於資
糧又所銓簡以德行為上功夫次之折衷之方庶幾此
道尚書右僕射劉仁軌奏曰謹詳衆議條目雖廣其大

畧不越數途多欲使常選之流及負謹之類遞立年限如不令赴集便是壅自新之路塞取進之門或請增置其案廣授官之數加習藝業峻入仕之途亦恐非勸獎之通規乖省員之茂躅徒云變更實恐紛擾但昇平日久人物滋殖解巾從事抑有多人頃歲以來據員多闕臨時雖有權攝終是不能總理望請尚書侍郎依員備足高班卑品准式分銓分銓則留放速了限速則公私無滯應選者暫集遠近無聚糧之勞合退者畢歸京師

無索米之弊既循舊規且順人情如事有不便隨時釐革其殿負及初選及選淺自知未合得官者等色情願不集即同選部曹司商量望得久長安穩垂拱元年七月鸞臺侍郎兼天官侍郎魏玄同以吏部侍郎選舉不得人上表曰漢諸侯得自置吏四百石以下其傳相大官則漢為之置州郡掾吏督郵從事悉任之牧守爰自魏晉始歸吏部遞相祖襲以迄於今用刀筆以量才按簿書而察行法令之弊由來久矣蓋君子重因循而憚

改作有不得已者亦當運獨見之明定卓然之議如今
選司所行者非上理之令典乃近代之權道所宜遷革
實為至要且天下之大士人之衆而可委之數人之手
乎假如平如權衡明如水鏡力有所極照有所窮銓綜
既多紊失斯廣又以比居此任時有非人情故既行何
所不至悠悠風塵此焉奔競擾擾遊宦同乎市井加以
厚貌深衷險如溪壑擇言觀行猶懼不勝今使考行究
能折衷於一面百寮庶職專斷於一司不亦難乎況今諸

色入流歲有千計羣司列位無復新加官有常員人無
定限選集之始霧積雲屯擢叙於終十不收一淄澠既
混玉石難分用舍去就得失相半周穆王以伯冏為太
僕正命之曰慎簡乃僚無以巧言亂色便僻側媚其惟
吉士此則命其自擇下吏之文也太僕正中大夫耳尚
以寮屬委之則三公九卿亦必然矣夫委任責成君之
體也所委者衆所用者精故能得濟濟之多士盛芄芃
之棫樸裴子野有言曰官人之難先王言之尚矣居家

觀其孝友鄉黨取其誠信出入觀其志義憂難觀其知
謀煩之以事以觀其能臨之以義以察其度始於學校
掄於州里告諸六事而後貢之於王庭其在漢家尚猶
然矣州郡積其功能乃為五府所辟五府舉其掾屬而
升於朝三公參得除置內尚書奏之天子一人之身所
闕者衆一賢之進其課也詳故能官得其人鮮有敗事
晉魏反是所失宏多子野所論蓋區區之宋耳猶謂不
勝其弊而況於當今乎今不待州縣之舉直取於書判

恐非先德行而後言語之意也臣又聞漢書張耳陳餘之賓客廝役皆天下俊傑彼之叢爾猶能若斯況以今國家而不建長久之策為無窮之根盡得賢取士之術而但顧望魏晉之遺風留意周隋之末事臣竊惑之伏願依周漢之規以分吏部之選即望所用精詳鮮於差失秘書省正字陳子昂上疏曰臣伏見陛下憂勤庶政而未以刺史縣令為念臣何以知陛下未以刺史縣令為念竊見吏部選人補縣令如補一縣尉耳但以資求

考取從官游歷卽補之不論賢良德行何以化人而拔擢見補者縱使吏部侍郎時有知此弊而欲超越用人則天下小人已囂然相謗矣所以然者習於常也所以天下庸流皆任縣令庸流一雜賢不肖莫分但以資次為選不復以才能得職所以天下凌遲百姓無由知陛下聖德勤勞夙夜之念但以愁怨以為天子之令使如是也自有國以來此弊最深而未能除也

神龍元年李嶠韋嗣立同居選部多引用權勢求取聲

望因請置員外官一十餘員由是僥倖者趨進其員外官悉行形勢與正官爭事百司論競至有相毆擊者及嶠復入相乃深悟之見朝野喧議乃上疏曰自寶命中興鴻恩溥被惟以爵為惠不擇才能任官授職加階朝遷夕改正闕不足加以員外非復求實助理多是為人擇官接武隨肩填曹溢府無益政化虛請俸祿在京則府庫為之殫竭在外則黎庶被其侵漁伏願微惜班榮稍減除授使匪服之議不興於聖朝能官之謠復光於

曩載

開元三年左拾遺張九齡上疏曰古之選用取其聲稱
或遙聞辟召或一見用之是以士修素行不圖僥倖臣
以為吏部始造簿書以備人之遺忘今反求精於案牘
不急於人才亦何以異遺劒中流而刻舟以紀去之彌
遠可為傷心凡有稱吏部之能者則曰從尉與主簿從
主簿與縣丞斯選曹執丈而善知官次者也惟論合與
不合不論賢與不賢大畧如此豈不謬哉臣以為選部

之法弊於不變變法之易在陛下渙然行之夫以一詩一判定其是非適使賢人君子從此遺逸而有識者之所嘆息也

十三年十二月封獄迴以選限漸迫宇文融上表請置

十餘銓

禮部尚書蘇瓌刑部尚書韋抗工部尚書盧從愿右散騎常侍徐聖戶部侍郎宇文融朝集使

蒲州刺史崔林魏州刺史崔沔荊州長史韋廋心鄭州刺史賈曾懷州刺史王丘等十人

當時榜詩

云員外却題銓裏榜尚書不得數中分

尚書裴淮員外郎張均

其

年太子右庶子吳兢上表諫曰臣聞易稱君子思不出

其位言各止其所不侵官也此實百王準的伏見勅旨
令刑部尚書韋抗等十人分掌吏部銓選及試判將畢
遽召入禁中決定雖有吏部尚書侍郎皆不得參議其
事議者皆以陛下曲受讒言不信於有司也然則居上
臨人之道經邦緯俗之規必在推誠方能感物抑又聞
欲用天下之智力者莫若使天下信之也故漢光武置赤
心於人腹良有旨哉昔魏明帝嘗卒至尚書省尚書陳
嶠跪問曰陛下欲何之帝曰欲案行省司文簿嶠曰此

自臣之職分非陛下所宜臨若臣不稱職則宜黜退陛下宜還宮帝慙迴車而返又陳平丙吉者漢家之宰相尚不問錢穀之數不問鬪死之人故知自天子至於卿士守其職分而不可侵越也況我大唐萬乘之君卓絕千古之上豈得下行選人之事損取怪於朝野乎凡是選人書判並請委之有司仍停此十選銓分選依舊以三銓為定上元元年劉曉上疏曰臣聞論語有曰為政以德譬如北辰詩曰愷悌君子民之父母豈有使父養

子而憂不得所者哉今國家以吏部為銓衡以侍郎為藻鑑鏡所鑑者貌也妍媸可知衡所平者法也年勞可驗至於心之善惡何以取之取之不精必貽後患今選曹以檢勘為公道以書判為得人夫書判者以觀其智也智及之仁不能守之可使從政者歟不可使之而或任之是貽患於天下也使有德行侔於甲科書判不能中的其可舍之乎況於書判借人者衆矣求士舉於鄉閭者可謂至矣且人不孝於其親者豈有忠於君乎不

友於兄弟者豈肯順於長乎不恤於孤遺者豈肯恤百姓乎不義而取財者豈肯不犯賊乎不直而好僞者豈肯守恒乎強悖而任氣者其肯惠和乎博奕而畋遊者其肯正廉乎不以辱為辱者其肯敬慎乎夫士無此病則可任之以官也天寶十載吏部選才多濫選人劉廼獻議於知銓舍人宋昱曰虞書稱知人則哲能官人則惠魏魏唐虞舉以為難今吏部既始之以掄材終之以授位是則知人官人斯為重任昔在禹稷臯陶之衆聖猶

曰載采有九德考績以九載近代主司獨委一二小冢
宰察言於一幅之判觀行於一揖之內古今遲速何不
侔之甚矣夫判者以狹辭短韻語有定規為體猶以一
小治而鼓衆金雖為鼎為鑪不可得也故曰判之在文
至局促者夫銓者必以崇衣冠自媒耀為賢斯又士之
醜行君子所病者引周公尼父於銓庭則雖圖書易象
之訓以判體挫之曾不及徐庾雖有淵默罕言之至德
以喋喋取之曾不若嗇夫嗚乎彼干霄蔽日誠巨樹也

當求尺寸之材必後於椽杙龍吟虎嘯誠希聲也若尚
頰舌之感必下於鼃黽觀察之際能不悲夫執事慮過
龜策文含雅誥豈拘拘以瑣悉細故曲折因循哉誠能
先咨以政事次徵以文學退觀其理家進察其臨節則龐大
閎深之士亦可以窺其門戶矣

貞元四年八月吏部奏伏以艱難以來年月積久兩都
士類散在遠方三庫勅甲又經失墜因此人多冒濫吏
或詐欺分見官者謂之擘名承已死者謂之接脚乃至

制勅旨甲皆被改張毀裂如此之色其類頗多比來因循遂使滋長所以選集加衆真偽混然實資檢責用甄涇渭謹具由歷狀樣如前伏望委諸州府縣於界內應有出身以上便令依樣通狀限勅牒到一月內畢令盡出不得遺漏其勅令度支急遞送府州司州司待約狀畢以州印印狀尾表縫相連星夜送觀察使司定判官一人專使專勾當都封印差官給驛遞驛送省至上都三百里內十二月上旬到千里外中旬到每遠校一千里

外即加一旬雖五千里外一切正月下旬到盡黔中嶺
南應不合比選人不納文狀限其狀直送吏曹不用都
司發到入日所司造姓攢勘合即奸偽必露冤抑可明
如須盤問即下所在州府責狀其隱漏未盡及在遠不
及期限者亦任續通依前觀察使與送所勘責必有灼
然踰濫事跡著明據輕重作條件商量聞奏庶稍澄流
品永息踰濫勅旨依奏至六年十二月詔吏部續流選
人新授官者至來年二月之任初吏部侍郎劉滋李紆

以去冬選人無缺員乃奏請自貞元五年授官計考成者三百五十員令至今年八月之任議者非之於是諫議大夫韓章抗疏曰竊見去年選授官者多以六月方至任所扶老攜幼不遠數千里以就一官到纔經年遂見停替又見在留中人多有注貞元四年闕者准格至來年正月赴任其續流人注五年缺者遽以今年八月便任一等用闕一等授官五年闕者授替在前四年闕者仍在後事交非允者理實可矜今制命已行難於

改易其所授官人請令至來年二月赴任從之

元和元年十二月吏部奏比遠州縣官請量減選五選
六選請減一選七選八選請減兩選十選十一選十二
選各請減三選伏以比遠處都七十五州選人試後懼
不及限者即狀請注擬雖有例不過一百餘人其比遠
州縣皆是開元天寶中仁風樂土今者或以俸錢減少
或以地在遠方凡是平流因循不注至若勸課耕種歸
懷逃亡其所擇才急於近地有司若不注授所在惟聞

假攝編氓益困田土益荒請減前件選勅旨宜依

十一年九月中書門下奏字人之官從古所重遂許聞
薦冀得循良其或不依節文虛指事跡既開繆舉之路
實扇僥求之風望自今以後所舉人事跡與節文不同及
檢勘無據并到官後不稱職及有負犯等事並請量輕
重坐其舉主輕則削奪重則貶謫伏以前後勅文雖有
條約比來銓覈多務因循今重申明所期畫一其舉人
到省後所司勘檢如與節文不同即具事由並舉主名

銜申中書門下如所司鹵莽便與判成察知事狀違越則所司與舉主同坐從之

寶歷二年十二月吏部奏伏以吏部每年集人及定留放至於注擬皆約闕員近者入仕歲增員闕日少實由諸道州府聽奏悉行致令選司士子無闕貧弱者凍餒滋甚留滯者喧訴益繁至有待選十餘年裹糧千餘里累駁之後方敢望官注擬之時別遇勅授私惠行於外府怨謗歸於有司特望明立節文令自今以後使天下

州府內選限不得奏六品以下官勅旨依奏

太和七年五月勅節文州縣錄事參軍如在任績效明著兼得上下考及清白狀陟狀許非時放選仍優與處分其餘官見任得上下考語減三選如本官兩選以下者同非時人例處分

開成二年四月中書門下奏天下之理在能官人古今以選委重吏部自循資授仕銜鏡失權立格去留簿書得計比緣今年三月選事方畢四月以後方修來年格

文五月頒下及遠已屆秋期今請起今月與下長安格
所在府州榜門曉示其前資官取本任解黃衣本貫解
一千里內三月十日解到省二千里三千里遞加十日
並本州齎送選人發解訖任各歸家其年七月十五日
齊於所住州府看吏部長榜定留放其得留人並限其年
十二月十日齊到省試注唱正月內銓門開永為定例
如其年合用闕少選人文書無違犯可較則於本色闕
內先集選深人年長久其餘既無缺可集南曹但為判

成榜示所住州府許次年取本住州府公驗便依限赴
集更不重取本住本貫解舊格已久不便更改事遂不
行

四年勅吏部去冬粟錯及長名駁放選人等如聞經冬
在京窮悴頗甚街衢接訴有可哀矜宜委吏部檢勘條
鈐轄如非踰濫正身不到欠考欠選大段瑕病之外即
與重收以此遠殘闕注擬不得用平留闕如員不相當
不唱不伏官者便住冬集不在更論訴限如未經中書

門下陳狀勅下後不得續收今冬以後不得以爲例
會昌六年五月赦書節文吏部三銓選士祇憑資考多
非實才許觀察使刺史有奇績異政之士聞薦試用大
中六年五月勅大功以上親連任停解如已得資者依
本官選數集如未得資及未上並同非時人例放選
天祐二年四月勅應天下府州令錄並委吏部三銓注
擬自四月十一日以後中書並不除授或諸薦奏量留
卽度可否施行

掌選善惡

貞觀元年溫彥博為吏部郎中知選意在沙汰多所擯抑而退者不伏囂訟盈廷彥博惟騁辭辨與之相詰終日喧擾頗為識者所嗤四年杜如晦臨終請委選舉於民部尚書戴胄遂命檢校吏部尚書及在銓衡抑文雅而獎法吏不適輪轅之用物議咸以為太刻五年楊纂為吏部侍郎銓敘人倫稱為允當然而抑文雅進黠吏觀時任數亦為時論所譏

八年十一月唐皎除吏部侍郎嘗引入銓問何方便穩
或云其家在蜀乃注與吳復有云親老先任江南即唱
之隴右論者莫能測其意十七年楊師道為吏部尚書
貴公之子四海人物未能委練所署用多非其才而深
抑勢貴及其親黨將以避嫌時論譏之又其年吏部尚
書高季輔知選凡所銓綜時稱允愜十八年於東都獨
知選事太宗賜金背鏡一面以表其清鑑焉

龍朔二年司列少常伯楊思立特外戚之貴待選流多

不以禮而排斥之為選者夏侯彪所訟而御史中丞郎
餘慶彈奏免官中書令許敬宗知楊吏部之敗或問之
敬宗曰一彪一狼共看一羊不敗何待

總章二年司列少常伯李敬玄典選累年銓綜有序天
下稱其能參選者歲有萬人每於街衢見之莫不知其
姓名其被放有訴者即口陳其書判錯失及身曾負殿
畧無差舛時人服其強記莫之敢欺

弘道元年十二月吏部侍郎魏克已銓綜人畢放長榜

遂出得留人名於是衢路誼譁大為冬集人援引指摘
貶為太子中允遂以中書舍人鄧玄挺替焉玄挺無藻
鑑之目又患消渴選人因號為鄧渴

如意元年九月天官侍郎李至遠知典選時有選人姓
刁又有王元忠並被放乃密與令史相知減其點畫刁
改為丁王元忠改為士元中擬授官後即加文字至遠
一覽便覺曰今年銓覈數萬人總記識姓名安有丁士
者此刁某王某也遽窮其姦登時首服省中以為神明

長壽二年九月許子孺除吏部侍郎性無藻鑑所視銓綜皆委令史縱直謂直曰汝平配也

久視元年七月顧琮除吏部侍郎時多權幸好行囑託琮性公方不堪其弊嘗因官齋至寺見壁上畫地獄圖因指示同行曰此亦稱君所為何不畫天官掌選耶

景龍三年鄭愔與崔湜同執銓管數外倍留人及授擬不偏即採用三考一百日闕夏不行又用兩考一百日闕朝注夕改無復准定選人得官乃有三考不得上者

有一人索遠得校書郎其或未能處置者即給公驗謂之比冬故選司綱維紊亂以崔鄭為口實

景雲元年以盧從愿為吏部侍郎精心條理大稱平允其冒名偽選及虛增狀功之類皆能摘發其事典選六年頗有聲稱時人云前有裴馬後有盧李

開元十二年十二月吏部侍郎崔琳以舊例有遠惡官六七百員恒不用比冬因選深人以此闕銓日對面注各得穩便不入長名用此遠闕都盡

十八年蘇晉為吏部侍郎而侍中裴光庭每選官應批
退者但對衆披簿以朱筆點頭而已晉遂榜選院云門
下點頭者更引注擬光庭以為侮已不悅時有門下主
事閻麟之為光庭腹心專知吏部典選每麟之裁定光
庭始下筆時人語曰麟之手光庭口

天寶元年冬選六十四人判入等時御史中丞張倚男
與判入高等有下第者嘗為勸令以其事白於安祿山
祿山遂奏之至來年正月二十一日遂於勤政樓下上

親自重試惟二十人比類稍優餘並下第張與不措一
詞時人謂之曳白吏部侍郎宋遙武當郡太守苗晉卿
貶安康郡太守考官禮部郎中裴晁起居舍人張烜監
察御史宋定昱左拾遺孟國朝並貶官

十一年十一月楊國忠為右相兼吏部尚書奏請兩京
選人銓日便定留放無長名於宅中引注號國垂簾觀
之或有老病醜陋者皆指名以笑雖士夫亦遭詬耻故
事兵部注官訖於門下過侍中給事中省不過者謂之

退量國忠注官呼左相陳希烈於坐隅給事中省於前
曰既對注擬即見過門下了希烈等腹非而已侍郎韋
見素張倚皆見衣紫與本曹郎官藩屏外排比案牘趨
走諮事乃謂簾中楊氏曰兩個紫袍主事何如楊乃大
笑選人于是爭附會其旨焉二千餘選人率候於勤政
樓設齋兼為國忠立碑於尚書省所注文部三銓選人
務專鞅掌不能躬親皆委與令史及孔目官為之國忠
但押一字猶不可遍

貞元八年正月御史中丞韋正伯劾奏稱吏部貞元七年冬京兆府踰濫解送之人已授官總六百十六人或有不到京城銓試懸授官告又按選格銓狀自書試日書跡不同即與選放選殿違格文者皆不覆驗及降資不盡或與注官伏以承前曹選乖誤未有如此遂使衣冠以貧乏待缺姦濫以賄賂成名非陛下求才審官之意由是刑部尚書劉滋以前吏部尚書及吏部侍郎杜黃裳皆坐削階

太和二年三月都省奏落下吏部三銓注今春二月申
內超資官洪師敏等六七十人勅都省所執是格銓司
所司是例互相陳列頗以紛紜所貴清而能通亦猶議事
以制令選已滿方此爭論選人可哀難更停滯其三銓已
授官都省落下者並依舊注重與團奏仍限五日內畢
其如官超一資半資以令授稍優者至後選日量事降
折尚書侍郎注擬不一致令都省以此有詞鄭綱丁公
著宜罰一季俸東銓所落人數較少楊嗣罰兩月俸其

今年選格仍分明標出近例異絕徼求時尚書左丞崔景以吏部注擬多不守支選人中僥倖者衆糾案其事落下甲選人革已成之官經宰相喧訴故特降此勅

吏曹條例

總章二年四月一日司列少常伯裴行儉始設長名榜引銓注期限等法又定州縣升降官資高下以為故事仍撰譜十卷其年十一月吏部侍郎李敬玄委事於員外郎張仁禕仁禕有識畧吏幹始造姓歷改修狀樣

銓歷等程式敬玄用仁禕之法銓綜式序仁禕感國士
見委竟以心勞嘔血而死

開元十八年十一月侍中兼吏部尚書裴光庭奏用循
資格至二十一年光庭薨中書令蕭嵩與光庭不協以
循資格取士不廣因奏事言之六月二十八日詔古者
諸侯舉士必本於鄉曲府庭署吏亦出於行能所以人
自檢修官無敗政及乎魏承漢弊權立九品今之吏部
用是因循入仕寢多為法轉密然於濟理求才未聞深

識持衡處事徒為具文朕寤寐永懷每以怡悵夫琴瑟
不調者改而更張法令不便者義復何異頃者有司限
數及拘守循資遂令銓衡不得探拔天下賢俊屈滯頗
多凡人三十始可出身四十乃得從事更造格限分品
為差若如所制之文六十尚不離一尉有材能者始得
如此稍敦朴者遂以終身由是言之豈為明恕自今以
後選人每年總令赴集依舊以三月三十日為限其中
有才優業異操行著明者一委吏部臨時擢用貴於取

實何限常科雖遠郡下寮名跡稍著亦須甄拔令其勸
勉俾人思為善之利俗知進取之途朕所責成實在吏
部可舉其大畧令有所依比者流外奏申乃引過門下
簿書堆盈於璫闥胥吏填委於掖垣豈是合宜過為煩
碎自今以後亦宜依舊

二十八年八月以考功貢院地置吏部南院以懸選人
文選或謂之選院其選院本銓之內至是移出之東都
至二十一年七月以太常園置之

二十二年七月六日吏部尚書李嵩奏曰伏見告身印與曹印文同行用參雜難以區分望請准司勳兵部印文加告身兩字從之

二十四年十二月二十四日勅王子未出閣者侍講侍讀侍文侍書並取見任官充經三周年放選與處分習藝官諸色內教通取前資及常選人充經二年以上選日各於本色量減兩選與處分左右衛三衛及五品以上子弟經七年雜衛經八年勳官經九年並放選與處分

貞元二年二月吏部奏伏准今年二月十三日勅除臺
省常參官餘六品以下並准舊例都付本司處分者其
六品以下選人中有人才書判無闕相當仍前准格皆
送中書門下又立功狀奏請要有褒揚等令並委本司
注擬即才同常格選人若無闕相當一一令待續闕事
即停滯必招喧訴應緣功狀及非時與官合授正員額
並選限內無闕注擬者伏請量事計日用成三考闕如
臨時人數稍多注擬不足灼然處置發遣即請兼用兩

考以上得資闕並量人才資序注擬訖准勅送中書門下詳定可否其六品以下有官資稍高合入五品縱非五品亦請依前送各勅旨兩考闕下在用限其三考闕亦非當年准格合用除別授官人外亦不在用限如闕員不足選人事處分者臨時奏聽進止餘例依 其年

三月勅旨五品官准式不合選補使注擬宜付吏部檢勘訖送中書門下其據資敘却合授六品已下官便任處分 其年五月吏部奏伏准貞元元年七月二

十五日勅諸州府及京五品以上官停使下郎官御史等宜付所司作條件聞奏者緣諸色人功優非時授官闕員稍多請作節限許集上州刺史兩府少尹四赤令停替後請許一月日於都省陳牒納文狀畢檢勘同具由歷每至月終送名中書門下仍請不試太原河中鳳翔江陵成都興元府少尹赤令及京兆次赤令中下州刺史諸使下停減郎官御史等停官當年並聽集六品以下常參官以理去任者當聽集具員官京兆府先申

中書門下省檢勘未成失文歷者其中先東西在遠不
及選集並請依後件合集人限所在陳牒隨例赴集選
人有明經進士道舉明法出身人有經制舉宏詞拔萃
及第判入等清白狀並曾有上下考校奏成及孝義名
制及勅褒獎者或曾任郎官御史起居補闕拾遺太常
博士兩府判司兩府畿赤官使下郎官觀察使節度都
團練都防禦度支水陸團運鹽鐵使留守等判官文使
推官書記等制勅分明貞元元年十二月已前離任者

一切聽集並六府少尹雉赤令並在試例應未及一考
以下被替丁憂服滿廢省患解侍親並隔絕不上州府
縣升降等官並聽當年緣未得資望准六品以下選
人例所試狀入下等望臨時據人材定當放其違程不
上人經免殿者聽集仍却還本道本色官應准格未合
集人其中有文詞宏瞻學術精通灼然為人所知亦任
於所在府州陳狀本州長官精加選擇堪獎拔者且解
申送依例赴集至省審考覈有才實相副別狀送名

如有踰濫其本州署申解牒本判官量事科技四品官
中有衰疾情願任致仕官者但是正員不限考數任於
所在州府陳牒依合集人狀樣通由歷准前送本道觀
察使上省不用身到禮部附學官先及第人黃蘭吏部
者並所集准例試狀定留放應集合試官並望准舊例
狀一道仍准建中二年格例及大曆十一年六月勅請
條委左右僕射兵部尚書侍郎同考試具狀考入上等
其名所試狀依限送中書門下其考入下等者任還十

一年十月罷吏部兵部司封司勲寫急獲告身凡九十員

二十三年二月齊抗以太常卿代鄭餘慶為中書侍郎平章事先時每歲吏部選人試判別奏官考覆第其上下既考中書門下覆奏擇官覆定以為例抗為相乃奏言吏部尚書已是朝廷精選不宜別考重覆其年他官考判訖俾吏部侍郎自覆明年遂不置考判官蓋因抗所論奏也

太和三年八月勅旨凡權知授官皆本資稍優未合便得藉不擢用故且權知若通知計五考即便同正授極為僥倖自今以後應謂州府五品長馬擢知正授通計六考滿停其勒留官如有未滿去考停給課料者便准此却與資給

四年五月中書門下奏准太和元年九月勅釐革兩畿及諸州縣官考山劒三川硤內及諸州比遠許奏縣令錄事參軍其餘停勅下以來諸道並有奏請如滄景德

棣已三數員伏以勅令頒行不合違越苟有宜便則須改張自今以後山劒三川硤內及諸道比遠州縣官出身及前資正員官人中每道除令錄外望各許三數員如河北滄景德棣之類經破蕩之後及靈夏邠寧鄜坊等州全無俸料有出身及正員官悉不肯去吏部從前多不注擬如假攝有勞望許於諸人中量事奏三數員其餘約及期限並請依太和九年九月二日勅處分從之其年七月吏部應遠道州縣課料錢元額計料支

給不得更欠折當司據料前錢定數牒示選人使知委
勅旨宜依

五年六月勅南曹檢勘廢置詳斷選人儻有屈事足以
往覆辨明近年以來不問有理無理多經中書門下接
訴致令有司失職莫知所守選人踰分惟望哀矜若無
條約恐更滋甚起今以後其被駁選人若已依期限經
廢置詳斷不成自謂有屈任經中書門下陳狀狀到吏
部後銓曹及廢置當更為詳斷審事理可收即收如數

至三人以上廢置郎官請牒都省罰置如至十人以上
其事狀申中書門下處分如經廢置詳斷公然越許或有
已經詳斷不錯輒更有投論者選人重遲兩選當日具
格文榜示莫無寬濫亦免僥求八年八月勅吏部踈理
諸色入仕人等令勘會諸司流外令史府史掌閑禮生
楷書畫工及諸司流外令史等總一千九百七十二員
六百五十七員請權停一千三百七十二員請令請司
守缺除見在外以後不得更置委御史臺察訪

開成二年六月吏部南曹奏准今年五月勅長安選格加置南曹郎一人別制印一面勅依旨

會昌五年七月勅應在京百司官典優成授官人等既云趨吏執舉簿書優成命官須居散秩近日僭越殊甚頗紊舊規累資或直於登朝班序宜容於雜類自今以後如有改轉官宜於中下州長馬但不令登朝事貴得體永為常式

天祐三年四月十九日吏部奏今後選人如是格式分

送員闕任其穩便去處請官不得妄指補諸道假滿拋
不到任停留官元闕及違程不上月限等闕從之



唐會要卷七十四

欽定四庫全書

史部
唐會要卷七十五

詳校官編修臣溫汝适

編修臣程嘉謨覆勘

總校官降調編修臣倉聖脉

校對官中書臣王學海

謄錄監生臣馮金錫

欽定四庫全書

唐會要卷七十五

宋王溥撰

選部下

選限

武德初因隋舊制以十一月起選至春即停至貞觀二年劉林甫為吏部侍郎以選限既促多不究悉遂奏四時選隨到注擬當時以為便貞觀十九年十一月馬周

為吏部尚書以吏部四時持衡畧無暇休遂奏請取所
由文解十月一日赴省三月三十日銓畢按工部侍郎
韋述唐書云貞觀八年唐皎為吏部侍郎以選集無限
隨到注擬時漸太平選人稍衆請以冬初一集大集季
春而畢至今行用之諸史又云是馬周未知孰是兩存
焉

開元二十年正月二十二日吏部尚書裴光庭奏文武
選人承前三月三十日始畢比團甲已至夏末自今以

後並正月三十日內團甲至二月內畢六月二十八日
蕭嵩奏吏部選人請準舊例至三月三十日團甲畢

貞元八年春中書侍郎平章事陸贄始復令吏部每年
禁選人舊事吏部常每年集人其後遂三數年一置選
選人併至文書多不可尋勘真偽紛雜吏因得大為奸
巧選人一蹉跌或十年不得官而官之闕者或累歲無
人贄令吏部分內外官為三分計闕集人歲以為常其
弊十去七八天下稱之

十五年六月勅六部奏選人依前三月三十日已前團奏畢其流外兵部禮部舉人等專委郎官恐不詳審共為取舍適表公平每至留放日皆就尚書侍郎對定既上下檢察庶在得人

元和四年三月二十五日勅今後宗正寺修撰圖譜官知匭使判官至考滿日各宜減兩選

藻鑑

武德七年高祖謂吏部侍郎張銳曰今年選人之內豈

無才用者卿可簡試將來欲縻之好爵于是遂以張行成張知運等數人應命時以為知人

咸亨中李敬玄為吏部侍郎時有楊炯王勃盧照鄰駱賓王並以文章見稱敬玄咸為延譽引以示裴行儉行儉曰才名有之爵祿蓋寡楊應至令長餘並鮮能令終時蘇味道王勳未知名因調選行儉一見深禮異之仍謂曰有晚年子息恨不見其成長二公十數年當居衡石願識此輩其後果如其言行儉嘗所引偏裨有程務挺張虔勗崔知諤王方

翼党金毗劉敬同郭待封李多祚黑齒常之盡為名將
證聖元年劉奇為吏部侍郎注張文成司馬鍾為御史二人因
申屠瑒以謝之奇正色曰舉賢本自無私二君何為見謝
聖歷二年吏部侍郎鄭杲注韓思復為太常博士元希
聲為京兆士曹嘗謂人曰今年掌選得韓元二人則吏
部不負朝廷矣

景雲二年盧從愿為吏部侍郎杜暹自婺州叅軍調集
補鄭縣尉後為戶部尚書從愿自益州長史入朝暹立

在盧上謂曰選人定如何盧曰亦由僕之藻鑑遂使明
公展千里足也

開元八年七月王丘為吏部侍郎拔擢山陰尉孫逖桃
林尉張鏡微湖城尉張普明進士王泠然李昂等不數
年登禮闈掌綸誥焉

十年十二月吏部侍郎崔琳掌銓收選人盧怡裴敦復
于孺卿等數人無何皆入臺省衆以為知人

非因銓選藻鑑附

武德初李勣得黎陽倉就食者數十萬人魏徵高季輔杜正倫郭孝怡皆客遊其所一見于衆人之中即加禮敬平武牢獲鄭州長史戴胄釋放推薦之當時以為有知人之鑒

永徽元年中書舍人薛元超好汲引寒微嘗表薦任希古高知周郭正一王義方孟利貞十餘人時論稱美聖歷中狄仁傑為納言頗以藻鑑自任因舉桓彥範敬暉崔玄暉張柬之袁恕已等五人後皆有大勲復舉姚

元崇等數十人悉為公相聖歷中則天令宰相各舉尚書郎一人仁傑獨薦其子光嗣由是拜地官員外莅事有聲則天謂之曰祁奚內舉果得人也

長安二年則天令雍州長史薛季昶擇察吏堪為御史者季昶以問錄事參軍盧齊卿舉長安縣尉盧懷慎季休光萬年縣主簿崔湜咸陽縣丞倪若水藍屋縣尉田崇璧新豐縣尉崔日用後皆至大官

景雲二年御史中丞韋抗加京畿按察使舉奏奉天縣

尉梁昇卿新豐縣尉王倕金城縣尉王永華原縣尉王
燾為判官其後皆著名位

其年朔方搃管張仁愿奏用監察御史張敬忠何鸞長
安縣尉寇泚鄠縣尉王易從始平縣主簿劉體微分判
軍事義烏縣尉趙良正為隨軍後皆至大官先天元年
侍中魏知古嘗表薦洹水縣令呂太一蒲州司功叅軍
齊澣右內率府騎曹柳澤及為吏部尚書又擢密縣尉
宋遙左補闕袁暉封希顏伊闕縣尉陳希烈後咸居清

要

開元元年盧齊卿為幽州刺史時張守珪為果毅特禮接之謂曰十年內當知節度果如其言

雜處置

乾封三年十月勅司戎諸色考滿又選司諸色考滿入流人並兼試一經一史然後授官

咸亨三年正月十八日許雍洛二州人任舉郡官

天冊元年十月二十二日勅品藻人物銓綜士流委之選

曹責成斯在且人無求備用匪一途理當才地並升輪
轅魚授或收其履歷或取其學行糊名考判立格注官
既乖委任之方頗異銓衡之術朕厲精思化側席求賢
必使草澤無遺方員曲盡改絃易調草故鼎新載想緝
熙之崇式佇宏通之效其常選人自今已後宜委所司
依常例銓注其糊名入試及令學士考判宜停

神功元年十月勅選司抑塞者不須請不理狀任經御史
臺論告不得輒于選司喧訴有凌突選司非理喧悖者

注簿量殿尤甚者仍於省門集選人決三十仍殿立六選

其年閏十月二十五日勅八寺丞九寺主簿三監丞簿
城門符寶郎通事舍人大理司直評事左右衛千牛衛
金吾衛左右率府羽林衛長史太子通事舍人親王掾
屬判司叅軍京兆河南太原判司赤城簿尉御史主簿
校書正字詹事主簿協律郎奉禮太祝等出身入仕既
有殊途望秩常班須從甄異其有從流外及視品官出
身者不得任前官其中書主書門下錄事尚書都事七

品官中亦為緊要一例不許頗乖勸獎其考詞有清幹
景行吏用文理者選日簡擇取歷十六考已上者聽量
擬左右金吾長史及寺監丞

聖歷元年二月二十二日勅選人無故三唱試三注不
到者不在銓試重注之例其過門下三引不過者亦不
在更注之限

三年正月三十日勅監察御史左右拾遺赤縣簿尉大
理評事兩畿諸縣丞簿尉三任已上及内外官經三任

下考以上不改舊選品者選敘日各聽量隔品處分餘
官必須依次授任不得超越

大足元年正月十五日勅選人應留不須安論考等若
諸事相似即先書上考如書判寥落又無善狀者雖帶
上考亦宜量放

開元二年二月十八日勅繁劇司闕官有灼然要籍者
聽牒選司于應得官人內據材用資歷相當者先補擬
三年六月八日勅吏部銓選委任尤重比雖守職務在

循常既限之以選勞或失之于求士宜選日拔擢一二人不須限資次放

四年六月十九日勅六品以下官令所司補授其外郎御史并餘供奉宜進名勅授

其年七月勅如聞黔州管内州縣官員多闕吏部補人多不肯去成官已後或假解或從征考滿得資更別叅選自餘管蠻獠州大率亦皆如此宜令所司于諸色選人內即召補並馳驛發遣至州令都府勘到日申所司

如遲違牒管內都督決六十追毀告身更不須與官此
其年九月十二日勅諸色選人納紙保後五日內其保
識各于當司具名品并所在人州貫頭銜都為一牒報
選司若有偽濫先用缺然後准式處分

十二年四月十五日勅要官兒子少年未經事者不得
作縣官親民

十二年初定吏部員外郎專判南曹

十四年十一月二十五日勅比來所注擬官多不慎擇

或以資授或未適才宜令吏部每年先于選人內精加簡試灼然明嫻法理者留擬其評事已上仍令大理長官相加簡擇不得授非其人

十五年九月勅令吏部選人宜依例糊名試判臨時考第奏聞

十七年二月勅邊遠諸州官多有老弱宜令吏部每年選人內簡擇強幹堪邊任者隨缺補授秩滿量減三兩選與留仍加優獎

原缺

八載六月十六日勅旨授官宜立攢符下諸郡府

九載三月十三日勅吏部取人必限書判且文學政事
本自異科求備一人百中無一況古來良宰宣必文人
又限循資尤難獎擢自今以後簡縣令但才堪政理即
甄取不得限以書判及循資格注擬諸圻望繫上中每
等為一申委中書門下察問選擇堪者然後奏授大理
評事緣朝要子弟中有未歷望圻縣使授此官既不守

文又未經事自今以後有此色及朝要至親並不得注
擬

十一載七月勅吏部選人書判濫及雜犯不合得留者
不限選數並放除此之外先後選深人一槩並留其選
深被放人選淺得留人名且留放逗留榜示選人各令
知委仍以單狀奏聞不須更起條目至十二月二日吏
部尚書楊國忠奏請兩京選人銓目便定當放無長名
遂詔文部選人調集者宜審定格限今集銓目各量官

資書判狀跡功優據闕合留對衆集便定其宏詞博學
或書判特優超流輩者不須定以選數聽集武部選人
集試日校第功優亦對衆留放

十三載三月二十八日勅旨授官取蜀郡大麻紙一張
寫告身

廣德元年二月勅諸州府及縣今後每有闕官宜委本
州當日牒報本道觀察節度及租庸使司具闕由附便
使牒中書門下送吏部依闕准式處分其所闕官有職

稍重者委本府長官于見任及比司官中簡擇權令勾當正官到日停不得更差前資及白身等攝吏部及制勅所授官委中書門下及吏部出後三日內下本州准令式計程外一月不到任本州報中書門下吏部用闕如灼然事故准勅勒留不在此限其限程人六品已下本色內殿一兩選許同會闕不成人例五品已上停一二年其選人諸州諸使不得奏用

大曆元年十二月勅許吏部選人自相舉如任官有犯

罪舉主

從吏部侍郎
王廷昌奏

十二年五月勅見任中書門下兩省五品已上尚書省
三品已上子孫各授官者一切擬京官不得擬州縣官
建中元年正月五日勅大理法官及太常禮官宜委吏
部每選時簡擇才識相當與本司商量注擬

貞元元年正月二十五日勅宜令清資常叅官每年于
吏部選人中各舉一人堪任縣令錄事叅軍者所司依
資注擬便于甲歷具所舉官名銜仍牒御史臺如到任

政理尤異及有贓犯事跡明著所司錄舉官姓名聞奏當
議褒貶仍長名後二十日舉仍永為常式七月吏部奏
准今年五月勅節文緣選人淹留多時理且權宜發遣
請量取建中四年授官至今計日成三考用闕注
擬其受替人皆于常例稍屈亦宜量事優擢委所
司選限畢後具所用闕人名銜聞奏至選日各減
一選

三年七月復置吏部小選

九年十二月制自今以後應諸使行軍司馬判官書記
參謀支使推官等使罷者如是檢校試五品已上不合
于吏部選集並准罷使郎官御史例冬季聞奏

十三年三月于吏部選人中簡擇通事舍人

十九年七月勅以關輔飢罷今歲吏部選集

元和三年正月吏部奏准去年六月勅元和元年下文
狀人但有續闕即便註擬元和二年下文狀人切待有
兩季下續闕至冬末合收用者注擬伏以非時選集見

在無多待闕多年艱辛轉甚其元年二月十三日已前
下文狀應未得官人並請依當年平選得選留人例一
時注擬其十月以後及今年下文狀人如元勅即與處
分亦請准前注擬其餘並請待註平選人畢有闕相當
便與註擬如無闕相當即請許待續闕勅旨依奏三月
勅秘書省弘文館崇文館左右春坊司經局校書郎正字宜
委吏部自今平流選人擇取志行廉退藝學精通註擬
七年十二月魏博奏管內州縣官二百五十二員內一

百六十三員見差假攝九十員請有司註擬從之

八年八月吏部奏請差定文武官告紙軸之色物五品已上用大花異紋綾紙紫羅標檀木軸六品下朝官裝寫大花綾紙及小花綾標檀木軸命婦邑號許用五色牋小花諸雜色錦標紅牙碧牙軸其他團窠綾標金銀花牋紅牙發鏤軸鈿等除恩賜外請並禁斷勅旨依奏其年九月刑部奏准今年七月二十一日勅諸色左降官等經五考滿許量移者其降貶日授正員官或無責

詞亦是責授並請至五考滿然後許本任處申闕並餘
左降官緣任處多在遐遠至考滿日其申牒稽遲致使
留滯者其刺史錄事參軍等並請與下考如滿後雖已
申牒未量移間其祿料並准天寶貞元兩度勅文依舊
支給其本犯十惡等罪已有正名請從舊從之

其年十一月勅有司奏申光蔡三州州縣官緣給復無
稅應支俸料今量定員額及課料其六品以下官仍令
吏部于選人中選優與註擬每月課錢委所司量與支

給其員外及課料等并額待給復年滿一切仍舊

十二年詔入粟助邊古今通制如聞定州側近秋稼方登念切効公不同常例有人能于定州納粟五百石者放同優比出身仍減三選一千石者無官便授解褐官有官者依資授官納二千石者超兩資如先有出身及官情願減選者每三百石與減一選

十五年二月中書門下奏見任正官員充職掌等比限兩考及授官經二周年已上方許奏請然後與依資改

轉有才在下位者不免留滯請自今後諸道使應奏請
正員官充職掌經一年者即依資與改轉如未周者即
量與類試官如此處分庶將得中勅旨依奏

寶歷二年十一月勅旨京官百司應合帶職事奏正員
官者自今已後宜于諸司及府縣見任官中選擇及府
縣見令本官充職如見任無相當者即任于其年選人
中奏用便據資歷與官不要待銓試仍永為常式

三年正月山陵使奏伏以景陵光陵已來諸司諸使所

差補押及雜掌官等皆據舊例合得減選其中有無選
可減者便放非時選吏曹緣是承優放選例多判成有
過格年深名身踰濫赴常選不得者多求減選掌職圖
得非時赴集因緣優勅成此倖門其吏曹為弊頗甚于
今請應差前資官充職掌不得取選數已過格人庶絕
奸冒勅旨依奏

太和四年七月吏部奏當司兩銓侍郎廳伏以吏部居
文昌首曹侍郎為尚書二職銓庭所宜順序廳事固有

等差舊以尚書廳之次為中銓其次為東銓自乾元中侍郎崔器以當時休咎為虞奏改中為西銓以久次侍郎居左以新次侍郎居右因循倒置議者非之伏請自今以後以久次侍郎居西銓以新除侍郎居東銓勅旨依奏

其年七月吏部三銓正令史每銓元置七人今請依太和元年流外銓起請置五人減下兩人南曹令史一十五人今請依太和元年流外銓起請節文減下三人奉

勅依奏

五年二月吏部奏請量抽太和三年終已來至三年三月四月以來得資及計人成三考闕四十五員伏緣去冬諸色黃衣參選者倍多于常年其間十七人皆是勲臣貴戚及常參官子弟不可任遠處州縣官三銓以當年合用闕方員發遣之外每銓各有十餘人未得官今請准元和中及長慶初勅例據見在人數量抽前件闕註擬單具所用闕聞奏勅旨宜依

其年六月勅應選人未試已前南曹駁放後經廢置詳
斷及准堂判却收比來南曹據給帖人數續到續試銓
司更不考判便同平留選人例註擬稍涉僥倖自今已
後應有此色並待正月十日准格詳斷限畢都引試判
不及格并雜犯及續檢勘庫并前選文案不同並駁放
不在更陳狀披訴及重詳斷之限

其年五月吏部奏准貞元十八年四月一日勅諸親註
得外官欲赴任自今已後每年須先奏聞者今請至時

准勅檢勘聞奏其諸親薨歿子弟註得外官准先後勅
合奏聞起自今已後請更赴集更不在重奏限其給勘
處審勘仍于家狀一一具奏親等第如違駁放勅旨依
奏其月五日勅應選人及冬集人案門下省檢勘畢後
比來更差南曹令史權領却納門下甲庫在于公事頗
甚勞擾自今已後諸勅吏部過院本令史便自分付甲
庫以備他年檢勘請門下省勅甲庫令史每過選照勘
收拾明立文案據官吏等遞相分付不得妄有破除南

曹申請之時如有稱失落欠少本令史專知官准勘檢
擅改違除流例處分

七年五月二十五日中書門下奏今後請今京兆河南
尹及天下刺史各于本府本道當選人中擇堪為縣令
司錄錄事叅軍人具課績才能聞薦其諸州先申牒觀
察使都加考覈申送吏部至選集者不要至試場更試
書判吏部尚書引詣銓曹試時務狀一道訪以理民之
術自陳歷任以來課績數條取其理識優長者以為等

第便以大縣註擬如刺史所舉并兩人得上下考者就加爵秩在任年考已深者優與進改其縣令錄事得上下考兼績狀者許非時放選如犯贓一百貫以下者舉主量削階秩一百貫以上者移守僻遠小郡觀察使委中書門下聽奏進止所舉人中兩人善政一人犯贓亦得贖免其犯贓官永不齒錄從之

開成元年十月中書門下奏兩畿及兩京奏六品以下官除勅授外並吏部註擬准太和五年正月二十六日

勅中書門下奏近勅隔絕諸司奏六品以下官實免占吏部闕員亦稍絕邪濫其兩府司錄及尉知捕賊皆藉幹能敏練用差專任吏部註或慮與事稍乖自今已後京兆尹及河南府司錄及尉知捕賊滿據官資合入者充其餘並准太和元年九月十九日勅及太和四年五月七日勅處分

會昌三年四月勅文准太和元年十二月十八日勅進士初合格並令授諸州府叅軍及緊縣尉未經兩考不

許奏職蓋制科之人必弘理化黎元之弊欲使詣詳近者諸州長史漸不遵承雖注縣寮多縻使職苟從知已不念蒸人流例寢成供費不少況去年選格改更新條許本郡奏官便當府充職一人從事兩請料錢虛占吏曹正員不親本任公事其進士宜至今年諸道依資奏授試官充職如奏授州縣官即不在兼職之限

廣明元年勅吏部選人參錯長名人駁放者除有身名踰濫及欠選欠考外並以遠殘闕註擬

東都選

貞觀元年京師米貴始分于各州置選

開耀元年七月弘文館直學士崔融議選事曰關外諸州
道里迢遞洛河之邑天地之中伏望詔東西二曹兩京
都分簡留放既畢同赴京師

開元元年十二月遣黃門監魏知古黃門侍郎盧懷慎
往東都分知選事便令擬宋璟為東都留守攝門監過

官

元和二年九月詔東都留守趙宗儒權知吏部今年東都選事銓試畢日停

太和二年九月勅吏部今年東都選事宜令守河南尹王播權知侍郎銓試畢日停

三年四月勅東都選事宜停

闕

南選

上元三年八月七日勅桂廣交黔等州都督府比來所

奏擬上人首領任官簡擇未甚得所自今已後宜准舊制四年一度簡擇清強正五品已上官充使選補仍令御史同往註擬其有應任五品已上官者委使人共所營督府相知具條景行藝能政術堪稱所職之處奏聞大足元年七月二十九日勅桂廣泉建賀福韶等州縣既是好處所有關官宜依選例省補

開元八年八月勅嶺南及黔中參選大曹名文解每限五月三十日到省八月三十日檢勘使了選使及選人

限十月三十日到選所正月三十日內銓註使畢其領
南選補使盛移桂州安置

其年九月勅應南選人嶺南每府同一解嶺北州及黔
府管內州每州同一解各命所管勘責出身由歷選數
考課優勞等給作簿書先申省省勘應選人曹名考第
一事以已明造歷子選使魚本司對勘定訖便結階定
品署印牒付選使其每至選時皆須先使擬官受司團
奏後所司覆同即憑進畫應給籤告所司為寫限使奏

卷七十五
勅到六十日寫了差專使送付黔桂等州州司各送本
州府分付

天寶十三載九月勅如聞嶺南州縣近來頗習文儒自
今已後去其嶺南五府管內白身有詞藻可稱者每至
選補時任令應諸色鄉貢仍委選使准式考試有堪及
第者具狀聞奏如有情願赴京者亦聽其前資官并常
選人等有詞理魚通才堪理務者亦任北選及授北官
大歷十四年十二月二日勅南選已差郎官固宜專達

自今已後不須更差御史監臨

興元元年勅吏部侍郎劉滋知洪州選事

將京師寇盜之後天下蝗

旱穀價翔貴選人不能赴調乃命滋江南興選以其便江嶺之人時稱舉職

其年十一月嶺南選補使右司郎中獨孤慤奏狀伏准建中四年九月勅選補條件所註擬官便給帖放上至上都赴吏部團奏給告身勅旨准勅處分

貞元二年十月十日勅嶺南黔中選舊例補註訖給票放上其俸除手力紙筆園廚雜給之外餘並待奏申勅

到後始據旨給付其福建選補使宜停其桂廣泉建福賀韶等州宜依選例稱補

三年三月考功員外郎陳歸為嶺南選補使選人留放註官美惡違背令文唯意出入復供求無厭郵傳患之監察御史韓泰奏劾得罪配流恩州

元和二年八月命職方員外郎王潔充嶺南選補使監察御史崔元方監焉

長慶二年正月勅權停嶺南黔中今年選補

寶歷二年二月容管經畧使嚴公素奏當州普寧等七州
乞准廣韶桂賀四州例南選從之

太和三年勅嶺南選補雖是舊例但遠路行李未免勞
人當處若有才能廉使宜委推擇待兵息事簡續舉舊
章其南選使可更停一二年

七年正月嶺南五管及黔中等道選補使宜更權停一
二年

開成二年正月又權停三年

五年七月潮州刺史林郇苗奏州縣官請同漳河廣韶桂賀等州吏曹註官勅旨潮州嶺南大郡與韶畧同宜下吏部准韶州例收闕註擬餘依

其年十一月嶺南節度使盧鈞奏當道伏以海嶠擇吏與江淮不同若非諳熟土風即難搜求人瘼且嶺中往年弊是南選今之弊是北選臣當管一十五州唯韶廣兩州寮每年吏部選授道途遙遠瘴癘交侵選人若家事任持身名真實孰不自負無由肯來更以俸入單微

每歲號為比遠若非下司貧弱令吏即是遠處無能之流比及到官皆有積債十中無一肯識廉恥臣到任四年備知情狀其潮州官吏伏望持循往例不令吏部註擬且委本道求官若攝官廉慎有聞依前許觀察使奏準事堪經久法可施行勅旨依奏

附科甲

聖歷元年二月勅文武選人檢甲歷不獲者宜牒中書門下為檢如又不獲若在曹有官前後相銜可明者亦

聽為敘

開元二年二月勅諸色出身人銓試訖應常選者當年當色各為一甲團奏給告牒過百人已上分不滿五人附入甲

十六年五月勅諸蕃應授内外文武官及留宿衛長上者共一甲其放還蕃者別為一甲仍具形狀年履同為一奏

十九年四月勅應授官考校敘功累勲有失錯者門下

省詳覆有憑即為改註

其年五月十一日勅附甲授官無闕者却牒中書門
下改擬

天寶二年十一月勅諸州醫學生等宜隨貢舉例申省
補署十年與散官恐年深久檢勘無憑仍同流外例附
甲

大歷六年七月宰臣奏請自今已後勅授文武六品以
下官勅出後附兵部附甲團奏

貞元五年十二月勅除常參官及諸使判官等餘並附所司甲其兵部選人亦準此

八年二月戶部奏内外官應直京内百司及禁中軍并國親勅留人等戶部侍郎盧徵奏伏以前件直司諸勅留官等若勅出使帶職事及勅留京官即合以勅出為上日外官比勅到為上自如本司未經奏聞即合同赴任官例准貞元六年二月二十四日勅待甲出後省符到任日支給俸料者甲出未帶勅留官簽符先下州府

交替理例未免喧爭伏請起今以後並須挾多勒留勅到任方為上日支給料錢其附甲官有給甲依前勒留直諸司者待符甲後簽到州為上日支給課冀塞倖求庶絕論訴勅旨依

冬集

大曆十一年五月勅禮部送進士明經明法弘文及崇文生道舉等准式據書判資蔭量定冬集授散其春秋公羊穀梁周禮儀禮業人比緣習者較少開元中勅一

例冬集其禮業每年授散自今已後禮人及道舉明法等
等有試書判稍優并蔭高及身是勲官三衛者准往例
註冬集餘並授散

貢舉上

明經

上元元年十二月二十七日天后上表曰伏以聖緒出
自玄元五千之文實惟聖教望請三公以下內外百官
皆習老子道德經其明經咸令集讀一准孝經論所司

臨時策試請施行之至二年正月十四日明經咸試老子策二條進士試三條

儀鳳三年三月勅自今已後道德經孝經並為上經貢舉皆須兼通其餘經及論語任依恒式

長壽二年三月則天自製臣範兩卷令貢舉人習業停老子

神龍元年二月二日勅文天下貢舉人停習臣範依前習老子

開元十六年十二月國子祭酒楊瑞奏今之明習左氏者十無一二恐左氏之學廢又儀禮公羊穀梁亦請量加優獎遂下制明經習左氏及通周禮等四經者出身任散官至貞元元年五月二日勅自今已後明經習禮記及三傳者許冬集

天寶元年四月三日勅自今已後應舉除崇玄學生外自餘所試道德經宜並停仍令所司更別擇一小經代之其年加爾雅以代道德經至貞元元年四月十一日

勅比來所習爾雅多是草木鳥獸之名無益理道自今
已後宜令習老子道德經以代爾雅其進士亦宜同大
畧例帖試至十二年三月十七日國子司業裴肅奏爾
雅傳通話訓綱維六經為文字之楷範作詩人之興咏
備詳六親九族之禮多識鳥獸草木之名今古習傳儒
林遵範其老子是聖人玄微之言非經典通明之旨為
舉人所習之書伏恐稍乖本義伏請依前加爾雅奉勅
宜準天寶元年四月三日勅處分

二年三月禮月令篇宜冠衆篇之首餘依舊次

三年七月詔曰尚書古先所制有異他書今抄寫漸訛
傳疑于後學永言刊草必在從宜尚書應是古字體並
依今文

建中二年十二月中書舍人權知禮部貢舉趙贊奏應
口問大義明經等舉人明經之目義以為先比來相承
唯務習帖至于義理少有能通經術寢衰莫不由此今若
頓取大義恐全少其人欲且因循又慮無以勸學請約

舉司舊例稍示考義之難承前問義不形文字落第之後喧競者多臣今請以所問錄于紙上各令直書其義不假文言既與策有殊又事堪徵證憑此取舍庶歸至公如有義策全通者五經舉人請准廣德元年七月勅超與處分明經請減兩選伏請每歲甄獎不過數人庶使經術漸興人知教本勅旨明經義策全通者令所司具名聞奏續商量處分餘依貞元二年六月詔其明經有能習律一部以代爾雅者如帖經俱通于本色減兩選

合集日與官

十三年二月尚書左丞權禮部貢舉顧少連奏伏以取士之科以明經為首教人之本以義理為先至于帖書及以對策皆形文字並易考尋試義之時獨令口問對答之失覆視無憑黜退之中流議遂起伏請准建中二年十二月勅以所問錄于紙上各合直書其義不假文言仍請依經疏對奉勅宜依

元和二年十二月禮部貢院五經舉人請罷試口義准

舊試墨義十條五經通五明經通六便放入第從之
七年十二月權知禮部侍郎韋貫之奏試明經請停墨
義依舊格問口義從之

開成四年十月勅每年明經及第宜更與十人

帖經條例

貞觀九年五月勅自今已後明經兼習周禮并儀禮者
于本色者量減一選

永隆二年八月勅如聞明經射策不讀正經抄撮義條

纔有數卷進士不尋史籍唯誦文策銓綜藝能遂無優劣自今已後明經每經帖十得六已上者進士試雜文兩首識文律者然後令試策其書算舉人亦准此例即為常式

永淳一年三月詔舉人並詔策三道即為永例

開元八年七月國子司業李元瓘上言三禮三傳及毛詩尚書周易等並聖賢微旨生人教業必資事經遠則斯文不墜今明經所習務在出身咸以禮記文少人皆

競讀周禮經邦之軌則儀禮莊敬之楷模公羊穀梁歷
代從之今兩監及州縣以獨學無友四經殆絕事資訓
誘不可因循其學生望請量配作業并貢人叅試之日
習周禮儀禮公羊穀梁並請帖十通五許其入策以此
聞者或有敦勸仰望四海均集九經該備從之

十六年十月准國子祭酒楊瑒奏近舉明經者主司不
詳其述作之意每至帖試必取平頭年月孤經絕句自
今以後考試者盡帖平文以存大典

十七年三月國子祭酒楊瑒上言曰伏聞承前之例每年應舉常有千數及第兩監不過一二十人臣恐三千學徒虛費官廩兩監博士濫廩天祿臣竊見入仕諸色出身每歲向二千餘人方於明經進士多千餘倍自然服勤道業之士不及胥吏以之效官豈識先王之禮義陛下設學務以勸進之有司為約務以黜退之微誠實所未曉今監司課士已退其八九考功及第士又不收一二若長以為限恐儒風漸墜小道將興若以出身人多應諸

色都減豈在獨抑明經進士也

二十一年勅令士庶家藏老子一本每年貢舉人量減
論語一兩條策加老子策

二十五年二月勅今之明經進士則古之孝廉秀才近
日以來殊乖本意進士以聲律為學多昧古今明經以
帖誦為功罕窮旨趣安得為敦本復古經明行修以此
登科非選士取賢之道其明經自今已後每經宜帖十
取五已上免舊試一帖仍按問大義十條取六已上免

試經策十條答時務策三道取粗有文理者與及第其
進士宜停小經准明經帖大經十帖取通四已上乃准
例試雜文及策考通與及第其明經中有明五經已上
試皆通者進士中兼有精通一史能試策十條得六已
上者委所司奏聽進止其應試進士等唱第訖其所試
雜文及策送中書門下詳覆其所問明經大義仍須對
同舉考試庶能否共知取舍無愧有功者達可不勉歟
天寶十一載七月舉人帖及口試並宜對衆考定更唱

通否

其載十二月勅禮部舉人比來試人頗非允當帖經首
尾不出前後復取者也之乎頗相類之帖下為弊已久
須有釐革今請每帖前後各出一行相類之處並不須
帖

唐會要卷七十五